

其成婚子息於衙中應星則前月初生已送本家云水原府使李慶濬治冠一道長湍府使金德誠清苦自守吏畏民愛抱川縣監洪瑞龍勢家小民均役均賦通津縣監柳悅積年弊政一朝除去此四人者政聲甚美而但赴任皆未久矣楊州之人去思尹義立至欲聚銅而為碑竹州之人追慕李惟弘今方立石而頌德此則已適之守令不必追論而其流惠遺愛於民間者有不可沒焉故不容不達矣○卯時有霧氣午時太白見於已地申時日暈自夜一更至二更有赤氣○庚午○辛未○王世子問 安○以李增為內資寺正李慶祺為司憲府持平柳肇生為靈巖郡守○江原道暗行 御史朴頽賢 啓曰平海郡守李希聖勤幹多能官事大成闔境晏然遠近稱譽三陟府使朴慶新為治嚴明江陵府使崔山立政尚仁厚而此兩邑守令皆到任未久實績未著春川府使崔鐵堅不恤民事專務自奉流亡相繼怨讟盈路臣所經過之地亦多空家 詔使需用之物徵歛太煩加以不檢衙屬至有諺書貼子內出行下則居官